

Oktòb 2011

konferans jeneral

Yon Tan Pou Prepare

priyosite

teknoloji

jere tan

konferans jeneral

Yon Tan Pou Prepare

Pa Eldè Ian S. Ardern

Nan Swasanndis yo

Nou dwe konsakre tan nou nan bagay ki pi enpòtan yo.

Yuityèm chapit *Preche Levanjil Mwen an* atire atansyon nou sou jan pou nou byen itilize tan nou. Nan chapit sa a, Èldè M. Russel Ballard raple nou ke nou dwe fikse bi ak aprann metrize teknik pou nou akonpli yo (gade *Preche Levanjil Mwen an : Yon Gid pou Sèvis Misyone* [2004], 146). Metrize teknik nou bezwen pou nou atenn bi nou yo mande pou nou vin mèt nan jere tan nou.

Mwen rekonesan pou egzanp Prezidan Monson. Malgre tout sa l ap fè antanke yon pwofèt Bondye, li asire l, menmjan Sovè a te fè, pou l toujou gen ase tan pou l vizite malad yo (gade Lik 17:12-14), pou edifye pòv an espri yo, ak pou l sèvi tout moun. Mwen rekonesan tou pou egzanp plizyè lòt moun ki bay tan yo nan sèvis pwochen yo. Mwen temwanyen ke lè nou bay tan nou nan sèvis lòt moun, sa fè Bondye plezi epi sa rapwoche nou pi pre Li. Sovè nou an ap respekte pawòl li ki di: “Yon moun ki fidèl epi ki saj kounyeya ap konsidere kòm diy pou l eritye kay yo Papa m te pare pou li yo.” (D&A 72:4).

Yo pa janm vann tan; tan se yon pwodwi ke, menm si nou eseye, nou pa kapab achete nan okenn boutik pou kèlekeswa pri a. Poutan, lè nou byen itilize tan, li gen trè gwo valè. Nan nenpòt ki jounen, nou tout resevwa, san peye, menm kantite minit ak lè pou nou itilize e byen vit nou aprann, jan kantik nou konnen sa a ansenye nou an: “Le temps fuit rapidement, pour ne plus revenir” (“Mettons à profit le temps,” *Cantiques*, no. 143). Nou dwe byen itilize tan nou genyen an. Prezidan Brigham Young te di: “Nou tout gen dèt anvè Bondye pou kapasite nou genyen pou byen itilize tan nou, e l apral mande nou rapò presi sou fason nou itilize [li]. (*Enseignements des présidents de l’ église: Brigham Young* [1997], 286).

Parapò avèk egzijans nou genyen yo, nou dwe aprann fikse priyorite nan chwa nou yo pou yo ka matche avèk bi nou yo pou nou pa riske ekspoze anba van k ap pouse nou ranvwaye bagay yo epi gaspiye tan nou nan twòp aktivite ki ap fè nou pèdi tan. Mèt Enstriktè a te byen ansenye nou sou priyorite lè Li te deklare nan Diskou sou Mòn nan: “Se poutèt sa, pa chèche bagay mond sa a men chèche bay bagay Bondye yo premye plas, e etabli wayòm ni.” (Matye 6:33, referans a; soti nan Tradiksyon Joseph Smith, Matye 6:38). (Gade tou Dallin H. Oaks, “Focus and Priorities,” *Liahona*, Jiyè 2001, 99--102.)

Alma te pale sou priyorite lè li te ansenye ke “lavi sa a te vin tounen yon tan pou eprè; yon tan pou yo prepare pou rankontre Bondye” (Alma 12:24). Fason pou nou byen itilize eritaj presye sa a ki se tan nou an pou nou prepare pou n rankontre Bondye a kapab mande kèk gidans, men nou dwe si ke n ap plase Senyè a ak fanmi nou nan tèt lis la. Prezidan Dieter F. Uchtdorf te raple nou ke “nan relasyon familyal la *lanmou* reyèlman eple *t-a-n*”. (“Of Things That Matter Most,” *Liahona*, Nov. 2010, 22) Mwen temwanyen ke, si nou chèche èd sensèman atravè lapriyè, Papa nou ki nan Syèl la ap ede nou mete aksan sou sa ki pi merite tan nou pase tout lòt bagay.

Mal itilize tan nou se kouzen avèk parese. Lè n ap swiv kòmandman pou nou sispann fè parese a” (D&A 88:124), nou dwe asire nou ke rete okipe egal ak rete pwodiktif tou. Paegzanp, sa mèveye dèske nou kapab itilize mwayen kominikasyon ki jis alapòte dwèt nou tankou voye mesaj tèks, men fòk asire nou ke nou pa tonbe nan adiksyon kominikasyon elektwonik. Mwen gen enpresyon ke gen kèk moun ki tonbe nan pyèj yon nouvo fòm adiksyon ki pran tout tan nou, yon adiksyon ki rann nou esklav pou fè nou toujou ap

tcheke ak voye mesaj, epi konsa ba nou fo enpresyon ke nou okipe ak pwodiktif.

Gen anpil aspè pozitif nan aksè fasil kominikasyon ak enfòmasyon an. Mwen twouve ke sa itil anpil pou nou gen aksè a rechèch atik yo, diskou konferans yo, achiv jeneyalojik yo, ansanm ak resevwa email, rapèl facebook, tweet, ak tèks mesaj. Men kèlkeswa jan bagay sa yo bon, nou pa kapab kite yo pouse bagay ki gen plis enpòtans yo akote. Sa t ap tris anpil si telefòn ak konpitè, avèk tout pèfeksyonman yo, ta rive toufe senplisite lapriyè sensè nou fè yon Papa eman ki nan Syèl la. An nou dispoze pou mete nou ajenou osi vit ke nou fè pou voye tèks mesaj yo.

Jwèt elektronik ak zanmi sou entènèt yo se pa ranplasan dirab pou zanmi veritab ki kapab ba nou yon akolad pou ankouraje nou, ki kapab priye pou nou epi chèche sa ki pi bon nan nou. Mwen rekonesan anpil lè m wè kowòm, klas, ak manm Sosyete Sekou ki mete ansanm pou youn soutni lòt. Nan okazyon sa yo, mwen pi byen konprann sa Apot Pòl te vle di lè li te di:

“Nou pa etranje ankò, ni moun ki depasaj. Men, se sitwayen nou ye ansanm ak tout moun nan pèp Bondye a.” (Efezyen 2:19).

Mwen konnen nou jwenn pi gran bonè nou lè nou tounen vè Senyè a (gade Alma 37:37) ak sou bagay k ap pote yon rekonpans etènèl yo, olye ke san reflechi nou pase pil èdtan ap chanje pwofil nou sou rezo sosyal yo, ap jwe nan fèm sou entènèt oswa yon jwèt kote n ap voye zwazo ankòlè sou mi beton. Mwen egzòte nou chak pou nou reflechi sou bagay sa yo k ap vòlè tan presye nou yo epi pran detèminasyon pou nou vin mèt yo, olye nou kite yo vin mèt nou, nan nati yo pou mennen nan adiksyon an.

Pou nou gen lapè Senyè a pale a (gade Jan 14:27), nou dwe konsakre tan nou nan bagay ki pi enpòtan yo, e bagay Bondye yo pi enpòtan. Lè nou kominike avèk Bondye nan lapriyè sensè, lè nou li ak etidye ekriti yo chak jou, nou medite sou sa nou li ak santi yo, epi apresya aplike ak viv leson nou aprann yo, nou pwoche pi pre Li. Sa Bondye pwomèt nou sèke si nou chèche avèk dilijans nan pi bon liv yo “[Li] ap ba [nou] konesans pa mwayen Lespri Sen Li a” (D&A 121:26; gade D&A 109:14-15 tou).

Satan pral tante nou pou nou mal itilize tan nou atravè distraksyon degize. Eldè Quentin L Cook ansenye ke, malgre tantasyon yo, “Sen yo ki reponn ak mesaj Sovè a pa pral detounen pa anvè distrayan ak destriktè” (“Are You a Saint?” *Liahona*, Nov. 2003, 96). Hiram Page, youn nan Yuit Temwen Liv Mòmmon yo, te ansenye nou yon leson valab sou distraksyon. Li te gen yon

wòch epi pa mwayen wòch la li te konn ekri sa li te panse ki te revelasyon pou Legliz la (gade D&A 28). Apre yo te fin reprimande li, resi a di nou ke li te kraze wòch la fè l tounen pousyè pou l pa t janm tounen yon mwayen detounman pou li ankò.¹ Mwen envite nou pou nou chèche idantifye distraksyon k ap gaspiye tan nan lavi nou yo ke n ap bezwen, senbolikman, kraze tounen pousyè yo. Nou bezwen saj nan jijman nou pou asire nou ke fason nou itilize tan nou yo balanse kòrèkteman pou enkli Senyè a, fanmi nou, travay nou, ak bonjan aktivite rekreyatif. Jan anpil nan nou remake deja, nou gen plis bonè nan lavi lè nou itilize tan nou pou chèche bagay ki “vètye, emab, ki gen bon rapò oubyen ki atire louwanj.” (Atik Lafwa 1:13).

Tan pase trè vit nan revèy nou. Jodia se t ap yon bon jou, pandan revèy tan nou nan lavi mòtèl la ap avanse a, pou nou repase sa nou ap fè pou prepare nou pou n rankontre Bondye. Mwen temwanye ke gen gwo rekonpans k ap tann moun ki pran tan nan mòtalite a pou prepare pou imòtalite ak lavi etènèl. Nan non Jezikri, amèn.

Note

1. Gade Provo Utah Central Stake general minutes, 6 Avr 1856, vol. 10 (1855-60), Church History Library, Salt Lake City, 273 (òtograf, ponktyasyon, ak majiskil modènize): “Pè [Emer] Harris te di Apot yo te di l ke nou gen pou konbat kont prensipote ak pouvwa nan lye wo yo. Frè Hiram Page te detere yon wòch nwa, li te mete nan pòch li, lè l te rive lakay li te gade li. Li te gen yon fraz ekri sou papyè pou montre li. Osito ke l te ekri yon fraz’ yon lòt te parèt sou wòch la, jiskaske li te ekri 16 paj. Yo te di Frè Joseph sa. Yon moun te mande Joseph si sa te bon. Li te di li pa t konnen, men li te priye e li te resevwa revelasyon ke wòch la te soti nan dyab la. Apresa li te kraze l fè poud epi l te boule sa l te ekri yo. Sete yon travay pouvwa tenèb la. Amen.”